


梵網經合註

附雜集

冊五




菩薩戒羯磨文釋

彌勒菩薩說

唐三藏法師玄奘譯

明菩薩弟子智旭釋

此文出瑜伽師地論本地分中菩薩地之戒品凡
 受菩薩戒者最宜知之故奘師譯出別行也
 論百卷共為五分一本本地分二攝決擇分三攝釋
 分四攝異門分五攝事分就初本地分中分為十
 七地一五識身相應地二者意地三者有尋有伺
 地四者無尋唯伺地五者無尋無伺地六者三摩
 呬多地七者非三摩呬多地八者有心地九者無



研究
 書館
 印章

心地十者聞所成地。十一者思所成地。十二者修所成地。十三者聲聞地。十四者獨覺地。十五者菩薩地。十六者有餘依地。十七者無餘依地。就第十五菩薩地中。復分四持。就初持中。分十八品。第十戒品。菩薩戒本經。及羯磨文。咸出其中。言菩薩者。梵語具云菩提薩埵。此翻覺有情。謂能發起大智大悲。智則上求佛道。悲則下化有情。又設無大悲。則不成佛道。設無大智。則難度有情。悲智雙行。悲智不二。故名爲菩薩也。戒有三聚。一攝律儀戒。無惡不止。二攝善法戒。無善不行。三饒益有情戒。亦

名攝衆生戒。無生不度。梵語羯磨。或翻作法。或翻辦事。或翻爲業。以義求之。卽是白衆作法。辦如法之事業也。文分爲三。受戒羯磨第一。懺罪羯磨第二。得捨差別第三。

受戒羯磨第一。又分爲二。初明從師受。二明像前受。初中有四。初啟白請證。二正授戒法。三總結畢儀。四揀擇非器。初中二。初求許。二正白。初又二。初求。二許。今初

若諸菩薩。欲學菩薩三聚淨戒。或是在家。或是出家。先於無上正等菩提。發弘願已。當審訪求同法菩薩。

已發大願。有智有力。於語表義。能授能開。於如是等功德。具足勝菩薩所。先禮雙足。偏袒右肩。膝輪著地。合掌恭敬。如是請言。大德憶念。我如是名。於大德所。乞受一切菩薩淨戒。惟願須臾不辭勞倦。哀愍聽授。第二第三。亦如是說。既作如是。無倒請已。偏袒右肩。恭敬禮拜。供養十方三世諸佛世尊。已入大地。得大智慧。得大神通。諸菩薩眾。現前專念。彼諸功德。生殷淨心。

菩提心寶。人所固有。發心求戒。便得名爲菩薩。既爲菩薩。須學三聚淨戒。欲學此戒。理應兼受。蓋祇

此重輕諸戒。既能止惡。便具衆善。既能自攝。便能攝生。故卽名爲三聚淨戒。此戒不論在家出家。但要先發弘願。以爲其本。然後堪受。若不發弘願者。縱令求受。不得戒也。既發願求受。當審訪求同法菩薩。審者。求之精詳。訪者。求之周切。蓋不審。則恐歸非其師。不訪。則恐失於良導。言同法者。卽是先得我心之所同然。必欲上求下化者也。若非同法。豈堪作師。又雖已發大願。更須有智。則自知法用。有力。則能加被。人於語表義。能授能開。則依義不依語。故能應根而與。隨機而答。具足如斯勝功德。

者方可為師。既得師已。乃須三業專請。先禮雙足。表於至敬。偏袒跪膝。表於至謙。合掌。表於心無二向。此皆身業清淨。恭敬二字。即意業清淨。如是請言等。即口業清淨。請辭須三說者。二則不切。四則太煩。故但三說。名為處中。三業皆淨。如法而請。乃名為無倒請。既請之後。又復敬禮。供養諸佛菩薩。念彼功德。生於殷重清淨心者。以此菩薩戒法。乃徧用法界諸佛菩薩為師為證。一受之後。十方諸佛。皆是我師。大地菩薩。皆同我學。生如是心。方名殷重。方名清淨也。大地。即歡喜地。乃至法雲地。具如華嚴等經廣明。

二許

若諸菩薩欲授此菩薩以菩薩戒時。先應為說菩薩法藏。摩怛理迦菩薩學處。及犯處相。令其聽受。應以智慧觀察彼自所意樂。必堪能思。量擇受菩薩戒。非惟以他人勸受。非為欲勝他。故當知是名堅固菩薩。堪受菩薩淨戒律儀。乃以受戒之法。如其應。而正授之。

弟子求師。既須審訪。師攝弟子。亦須詳慎也。摩怛理迦。此云本母。善釋諸法相義。有似於阿毘曇本。

母能生妙慧。妙慧因論而生。故展轉皆名慧論。菩薩學處。指重輕諸戒犯處。指諸戒中犯有染汙不染汙等。夫以彼來求受。尚須如此觀察。則其慎重可知。今有輒勸人受者。胡不稍思之耶。

二正白為三。初求受者白。二授法者白。三明其獲益。初中又三。初白儀。二白辭。三白後淨心。

今初

其受戒菩薩。復於彼有智有力勝菩薩所。謙下恭敬。膝輪據地。對佛像前。合掌請言。

二白辭

惟願大德哀愍。授我菩薩淨戒。

前是師前私請。今復像前正請也。私請須三說者。師未聽許。應鄭重故。正請惟一說者。師已聽許。不煩瀆故。

三白後淨心

如是請已。專念一境。長養淨心。我今不久當得無盡無量無上大功德藏。即隨思惟。如是事義。默然而住。一境。即現前受戒事境。淨心。即求戒之心也。攝眾生戒。是解脫德。名無盡大功德藏。攝善法戒。是般若德。名無量大功德藏。攝律儀戒。是法身德。名無

上大功德藏。又一聚卽三聚。故無盡。三聚卽一聚。故無量。最尊最貴。不可思議。故無上。

二授法者白。又二初審問。二啟白。今初。

爾時有智有力菩薩。於彼能行正行菩薩。以無亂心。若坐若立。而作是言。汝如是名善男子聽。汝是菩薩。不。彼應答言。是發菩提願。未應答言。已發。自此已後。應作是言。汝如是名善男子聽。汝等今者。欲於我所受諸菩薩。一切學處。受諸菩薩。一切淨戒。謂律儀戒。攝善法戒。饒益有情戒。如是學處。如是淨戒。過去一切菩薩。已具。未來一切菩薩。當具。普於十方。現在一

切菩薩。今具。於是學處。於是淨戒。過去一切菩薩。已學。未來一切菩薩。當學。現在一切菩薩。今學。汝能受不。答言。能受。能授菩薩。第二第三。亦如是說。能受菩薩。第二第三。亦如是答。

無亂心者。正慧觀察。與菩提心相應。乃能以心印心。不惟口讀文言而已。是中共有三番問答。初須直下承當菩薩之名。不生退屈。二須真實發菩提願。不惟虛名。三須真實能受能學。三聚淨戒。不惟空願也。前二問答。止一徧者。意決定故。第三問答。須三徧者。貴詳審故。

二啟白

如是受已。能受菩薩不起於座。能授菩薩對佛像前。普於十方現住諸佛。及諸菩薩。恭敬供養。頂禮雙足。作是白言。仰啟十方無邊無際諸世界中。諸佛菩薩。今於此中。現有某名菩薩。於我某菩薩所。乃至三說受菩薩戒。我為作證。惟願十方無邊無際諸世界中。諸佛菩薩。第一真聖。於現不現一切時處一切有情。皆現覺者。於此某名受戒菩薩。亦為作證。第二第三。亦如是說。

能受菩薩不起於座。謂仍前胡跪以聽授者之啟白也。此之三白。正是授戒羯磨。初羯磨竟。十方世界妙善戒法。繇心業力。悉皆震動。二羯磨竟。十方世界妙善戒法。如雲如蓋。覆受者頂。三羯磨竟。十方世界妙善戒法。從受者頂門。流入身心。充滿正報。盡未來際。永為佛種。

三明其獲益

如是受戒羯磨畢竟。從此無間。普於十方無邊無際諸世界中。現住諸佛。已入大地。諸菩薩前。法爾相現。由此表示如是菩薩。已受菩薩所受淨戒。爾時十方諸佛菩薩。觀是菩薩法爾之相。生起憶念。故正智見。

轉由正智見如實覺知某世界中某名菩薩於某菩薩所正受菩薩所受淨戒一切於此受戒菩薩如子如弟生親善意眷念憐愍由佛菩薩眷念憐愍合是菩薩希求善法倍復增長無有退減如是名為受菩薩戒啟白請證

現前一念心性本自豎窮橫徧今能稱性發菩提心受菩薩戒則與一切諸佛菩薩心精通昭故羯磨一畢法爾能令諸佛菩薩悉知悉見乃至眷念憐愍加被使其倍增進也感應道交不可思議若此奈何羣迷不發心耶初啟白請證竟

二正授戒法四初明戒相二明犯相三簡異小乘四結歎功勝初又三初標徵二別釋三結成今初

若諸菩薩住戒律儀有其四種他勝處法何等為四他勝處法者智慧為自煩惱為他佛法為自魔力為他發心受菩薩戒本欲摧伏魔軍破煩惱賊今犯此戒反被煩惱所勝亦為魔力所勝也然梵網具明十重今祇列後四者凡有三義一者殺盜淫妄名為根本戒法無論在家出家沙彌比丘欲受此菩薩戒者必已先受五戒十戒及具戒等何勞

更宣。今但申明上弘下化。增上律儀而已。二者根本戒法。七眾設犯。不通懺悔。縱令大乘許其懺悔。須見好相。今此四戒。若輒中品纏犯。止須懺除。上品纏犯。猶容重受。故不可以根本四戒相濫同也。三者菩薩之行。或順或逆。方便甚多。故殺盜淫妄。容有開遮。惟此四戒。隨於一方所。一一趣中。悉不得犯。故獨明之。

二別釋卽爲四。第一自讚毀他戒。

若諸菩薩。爲欲貪求利養恭敬。自讚毀他。是名第一他勝處法。

瞋毀尚輕。貪讚乃重。讚毀合行。令人疏他親己。豈菩薩之心哉。

第二慳惜財法戒

若諸菩薩。現有資財。性慳財故。有苦有貧。無依無怙。正求財者。來現在前。不起哀愍。而修慧捨。正求法者。來現在前。性慳法故。雖現有法。而不捨施。是名第二他勝處法。

財法二施。菩薩正務。現有資財。揀非無財。貧苦無怙。揀非不應求者。此而不施。無慧甚矣。爲菩提故。勤行布施。不住於相。名爲慧捨也。正求法者。揀非

不求。雖現有法。揀非無法。此而不捨安用知法耶。
第三瞋不受悔戒

若諸菩薩長養如是種類忿纏。由是因緣不惟發起
麤言便息。由忿蔽故。加以手足塊石刀杖。捶打傷害
損惱有情。內懷猛利忿恨意樂。有所違犯。他來諫謝
不受。不忍。不捨怨結。是名第三他勝處法。

一念瞋心起。百萬障門開。况可捶打損惱。况可懺
猶不受乎。既已隔絕衆生。菩提願力安在。

第四說相似法戒

若諸菩薩謗菩薩藏。愛樂宣說。開示建立像似正法。

於像似法。或自信解。或隨他轉。是名第四他勝處法。
眞實正法。決與一印三印相應。像似正法。則似是
而非。決與愛見二網相應。說此像似之法。卽名謗
菩薩藏。蓋不必排撥毀訾。而後爲謗法也。舊已流
通。重爲舉揚。名宣說。闡擴輔翼。令使增廣。名開示。
自創新談。別陳宗旨。名建立。自信解者。卽是邪師。
隨他轉者。卽邪弟子。邪正不辨。則弘法者。盡皆謗
法者耳。可不悲夫。

三結成

如是名爲菩薩四種他勝處法。

名爲菩薩他勝處者。正顯不與小乘共也。若殺盜
婬妄。則大小乘其名爲根本戒矣。初明戒相竟。

二明犯相。二初出過。二簡別。今初。

菩薩於四他勝處法。隨犯四種。况犯一切。不復堪能
於現法中。增長攝受廣大菩提資糧。不復堪能於現
法中。意樂清淨。是卽名爲相似菩薩。非眞菩薩。

隨犯四種。言四中隨犯其一也。况犯一切。言具犯
四種也。現法卽現在一生。廣大菩提資糧。卽六度
萬行等。意樂清淨。卽菩薩淨心地也。

二簡別

菩薩若用軟中品纏。毀犯四種他勝處法。不捨菩薩
淨戒律儀。上品纏犯。卽名爲捨。若諸菩薩。毀犯四種
他勝處法。數數現行。都無慚愧。深生愛樂。是功德
當知說名上品纏犯。

纏卽十纏。一瞋。二覆。三睡。四眠。五掉。六悔。七嫉。八
慳。九無慚。十無愧。各有下中上品。軟卽下品也。下
品中品十纏犯戒。不名失戒。上品纏犯。便爲失戒。
捨卽失也。數數現行以下。重釋上品纏犯之相。二
明犯相竟。

三簡異小乘。二初明不失。二明失已容受。今

初

非諸菩薩暫一現行他勝處法。便捨菩薩淨戒律儀。如諸苾芻犯他勝處法。即便棄捨別解脫戒。

苾芻卽比丘。梵音楚夏耳。比丘戒法。專藉外緣。故易失。菩薩戒法。緣菩提心所感。故難失也。又比丘他勝處法。是殺盜婬妄。故一犯永失。菩薩他勝處法。是毀慳瞋謗。故偶犯仍未失也。別解脫者。梵名波羅提木叉。

二明失已容受

若諸菩薩。由此毀犯。棄捨菩薩淨戒律儀。於現法中。

堪任更受。非不堪任。如苾芻住別解脫戒。犯他勝法。於現法中。不任更受。

由此毀犯。謂上品纏犯也。縱令失戒。猶許更受。故不同小乘也。然復應知。以上品纏犯。此毀慳瞋謗。四戒。但失菩薩戒。不失比丘戒。故設懺悔。仍任更受。若犯殺盜婬妄。四戒。則既失比丘戒。并失菩薩戒。不任更受。雖依梵網懺悔。得見好相。止許作菩薩優婆塞。或作菩薩沙彌。終不得作菩薩比丘矣。三簡異小乘竟。

四結歎功勝二。初明勝。二例明。今初

如是菩薩所受淨戒。於餘一切所受淨戒最勝最上。無量無邊大功德藏之所隨逐。第一最上善心意樂之所發起。普能除滅於一切有情一切種惡行。餘一切所受淨戒。指八戒五戒十戒具戒等。以此種種淨戒。無不從菩薩淨戒海中流出。無不還歸菩薩淨戒海中。故惟此戒為最勝最上。乃總歎也大功德藏之所隨逐。歎其所獲勝益。第一意樂之所發起。歎其因地勝心。普能除滅一切惡行。歎其滅罪勝力。

二例明

一切別解脫律儀。於此菩薩律儀戒百分不及一。千分不及一。數分計分算分喻分。乃至鄔波尼殺曇分亦不及一。攝受一切大功德故。

一切別解脫律儀亦指八戒乃至具戒言之。鄔波尼殺曇。此翻近少。謂微塵是色之近少分也。大文二正授戒法竟。

三總結畢儀

如是已作受菩薩戒羯磨等事。授受菩薩俱起供養。普於十方無邊無際諸世界中諸佛菩薩頂禮雙足。恭敬而退。

此總結啟白請證及正授戒法之後應各運心普
供養也。

四揀擇非器二初不從受二不為說 今初

又諸菩薩不從一切諸聰慧者求受菩薩所受淨戒
無淨信者不應從受謂於如是所受淨戒初無信解
不能趣入不善思惟有慳貪者慳貪蔽者有大欲者
無喜足者不應從受毀淨戒者於諸學處無恭敬者
於戒律儀有慢緩者不應從受有忿恨者多不忍者
於他違犯不堪耐者不應從受有懶惰者有懈怠者
多分耽著日夜睡眠樂倚樂臥樂好合徒侶樂嬉談

者不應從受心散亂者下至不能穀牛乳頃善心一
緣住修習者不應從受有闇昧者愚癡類者極劣心
者誹謗菩薩素怛纜藏及摩怛迦者不應從受

此明菩薩法師應須揀擇根器不可妄順人求而
使其輒受也蓋此菩薩淨戒乃是諸聰慧者之所
求受今彼既無淨信乃至誹謗經論何堪受此戒
耶文中畧列二十二類一無淨信所謂不能趣入
不善思惟二有慳貪三慳貪增上成蔽四有大欲
五無喜足六毀淨戒謂隨於所受八戒五戒十戒
具戒既有毀犯未經懺悔得好相者皆為遮障七

不恭敬學處。八有慢緩。既於八戒至具戒等尚爾。不恭慢緩。何堪受此增上大戒。九有忿恨。十多不忍。十一不堪耐他違犯。十二懶惰而不勇猛。十三懈怠而不精進。十四多分有所耽著。十五睡眠倚臥。十六樂合徒眾。十七樂於嬉談。十八散亂不能善心一緣。十九闇昧。二十愚癡。二十一極劣心。二十二誹謗經論。如此諸人。決定不能被弘誓鎧。趣向菩提。故皆不應從受也。穀音邁。取牛乳頃。明其至暫。素怛纜。即修多羅。此云契經。摩怛迦。即摩怛理迦。解現上文。梵網不許揀擇種姓。今文特令揀擇根器。影畧互成。不可不知。

二不為說

又諸菩薩。於受菩薩戒律儀法。雖已具足受持究竟。而於毀謗菩薩藏者。無信有情。終不率爾宣示開悟。所以者何。為其間已。不能信解。大無知障之所覆蔽。便生誹謗。由誹謗故。如住菩薩淨戒律儀。成就無量大功德藏。彼誹謗者。亦為無量。大罪業藏之所隨逐。乃至一切惡言惡見及惡思惟。未永棄捨。終不免離。菩薩說法。貴在觀機。若見有情。於此淨戒能生信樂。則應宣示開悟。令其發起受戒之心。故梵網有

不化衆生之戒。然大須隨時思察。豈容率爾妄宣。反令衆生墮罪業耶。當知彼經此論亦互成也。已上大科初明從師受竟。

二明像前受

若諸菩薩欲受菩薩淨戒律儀。若不會遇具足功德。補特伽羅。爾時應對如來像前。自受菩薩淨戒律儀。應如是受。偏袒右肩。右膝著地。作如是言。我如是名。仰啟十方一切如來。已入大地。諸菩薩衆。我今欲於十方世界。佛菩薩所。誓受一切菩薩學處。誓受一切菩薩淨戒。謂律儀戒。攝善法戒。饒益有情戒。如是學

處。如是淨戒。過去一切菩薩已具。未來一切菩薩當具。普於十方現在一切菩薩今具。於是學處。於是淨戒。過去一切菩薩已學。未來一切菩薩當學。普於十方現在一切菩薩今學。第二第三亦如是說。說已應起。所餘一切如前應知。

補特伽羅。此翻有情。具足功德。謂已發大願。有智有力。於語表義。能授能開等也。審訪不得。方許像前自受。若遇明師而不從受。非癡卽慢矣。梵網制令求見好相。此中但貴發菩提心。今人設欲自誓受戒。大須自斟酌也。仰啟十方等。卽是三羯磨文。

所餘一切如前應知。謂法爾相現及四重法等。已上受戒羯磨第一竟。

懺罪羯磨第二。又分爲二。初誡令勿犯。二設犯應懺。今初。

若諸菩薩。從他正受戒律儀已。由善清淨求學意樂。菩提意樂。饒益一切有情意樂。生起最極尊重恭敬。從初專精。不應違犯。

或於師前。或於像前。皆名從他正受。善清淨求學意樂。約攝律儀戒言之。菩提意樂。約攝善法戒言之。饒益一切有情意樂。約攝衆生戒言之。從初受

已。卽應專一精純。恆時護持。護持此戒。不令違犯。卽便具足三聚功德也。

二設犯應懺。又二。初總誡疾除。二別示二懺。

今初。

設有違犯。卽應如法疾疾悔除。令得還淨。

有犯不悔。則日夜增長罪惡。故應疾疾除之。欲除其罪而不能如法。罪亦不除。故先誡令如法也。譬如淨衣。偶觸汗穢。速以灰水洗浣。乃可還淨。不用灰水。臭氣不滅。停待時日。臭氣亦難除矣。

二別示二懺。又二。初對首懺。二自誓懺。初又

二初明所對之人。二明懺法差別。今初如是菩薩一切違犯。當知皆是惡作所攝。應向有力於語表業能覺能授。小乘大乘補特伽羅發露懺悔。一切違犯。通指此中四重及戒本中四十一輕而言之也。比丘戒法。局在僧輪。故詳列五篇七聚。名為秘法。菩薩戒法。通於七衆。故一切違犯。均名惡作。但有可悔不可悔。若輕若重之殊耳。受戒必須大乘法師懺悔不拘小乘大乘者。以小乘比丘亦是住持僧寶。堪為菩薩滅罪故也。

二明懺法差別。又三初懺上品纏犯。二懺中品纏犯。三懺下品纏犯。及餘違犯。今初若諸菩薩。以上品纏。違犯如上他勝處法。失戒律儀。應當更受。

如上他勝處法。卽指毀慳瞋謗四戒而言之也。故雖失戒。猶許更受。若犯殺盜姪妄。則須求見好相矣。

二懺中品纏犯

若中品纏。違犯如是他勝處法。應對於三補特伽羅。或過是數。應如發露除惡作法。先當稱述所犯事名。應作是說。長老專志。或言大德。我如是名。違越菩薩

毘奈耶法。如前稱事。犯惡作罪。餘如苾芻發露悔滅惡作罪法。應如是說。

餘如苾芻等者。應言。長老一心念我某甲犯某甲罪。今從長老懺悔。不敢覆藏。懺悔則安樂。不懺悔不安樂。憶念犯發露。知而不覆藏。長老憶念我清淨戒身。具足清淨布薩。如是三說。彼應語言。自責汝心。應生厭離。答言。爾。又若對三有情懺悔者。彼犯罪人。既至三有情邊說罪事已。於此三有情中。隨一受懺悔者。應先問餘二有情言。若長老聽我受某甲菩薩懺悔者。我當受。二人應答言。可爾。然後

受其懺悔。若對過三人數懺悔。卽是對僧。應往僧中偏袒。脫屣禮僧足。胡跪合掌。如是白。大德僧聽。我某甲犯某甲罪。今從僧乞懺悔。如是三說。是中隨一受懺悔者。應作白言。大德僧聽。此某甲菩薩犯某甲罪。今從僧懺悔。若僧時到。僧忍聽。我受某甲菩薩懺悔。白如是。白已。犯罪者方陳懺辭。乃至語言。自責汝心。應生厭離。犯罪者答言。爾。

三懺下品纏犯及餘違犯。

若下品纏違犯如上。他勝處法及餘違犯。應對於一補特伽羅發露悔法當知如前。

餘違犯。卽戒本經中四十一輕。亦名衆多犯。亦名輕垢罪也。初對首懺竟。

二自誓懺

若無隨順補特伽羅。可對發露悔除所犯。爾時菩薩以淨意樂。起自誓心。我當決定防護當來。終不重犯。如是於犯還出還淨。

隨順補特伽羅。謂隨順小乘大乘正法。於語表業能覺能授者。也不應向未受戒人懺悔。亦不應向有違犯人懺悔。故設無清淨大小乘人。但可自誓而已。自誓誠切。則罪還出而戒還淨矣。已上懺罪。

羯磨第一竟

得捨差別第三。又分爲二。初明捨戒差別。二明得戒差別。今初。

略由二緣。捨諸菩薩淨戒律儀。一者棄捨無上正等菩提大願。二者現行上品纏犯他勝處法。

捨戒卽失戒也。先發無上正等菩提大願。乃得受戒。今既棄捨此願。則戒亦隨失。此一緣也。上品纏犯他勝處法。此二緣也。然或重發大願如法悔除。仍可重受。

次明得戒差別。又二。初明盡未來永得。二釋轉。

生重受疑 今初

若諸菩薩雖復轉身徧十方界。在在生處不捨菩薩淨戒律儀。由是菩薩不捨無上菩提大願。亦不現行上品纏犯他勝處法。

八關戒法。局在一日一夜。五戒十戒。具戒局在盡壽。惟此菩薩戒法。一得永得。直至盡未來時。若無退心犯重二緣。終不捨失也。

二釋轉生重受疑

若諸菩薩轉受餘生。忘失本念。值遇善友。為欲覺悟菩薩戒念。雖數重受。而非新受。亦不新得。


無作戒體。一發之後。永為佛種。縱令轉生忘失。然既無退心犯重二緣。當知戒體仍在。雖數數重受。但令覺悟而已。豈名新受新得哉。

菩薩戒羯磨文釋

邵陽信女魏綉君施洋銀十圓敬刻此卷連圈

計字七千四百四十一箇

同治十三年春二月金陵刻經處識



重定授菩薩戒法

明菩薩戒弟子古吳智旭述

若諸菩薩欲學菩薩三聚淨戒。或是在家。或是出家。先於無上菩提發願。已審求功德。具足有智。有力。菩薩法師。先禮雙足。偏袒右肩。膝輪據地。合掌恭敬。作如是請。

大德憶念我某甲於大德所乞受一切菩薩淨戒。

惟願須臾不辭勞倦哀愍聽授。如是三說。

既請師已。乃往像前。燒香致敬。或復清眾為舉香讚。香讚既畢。一心恭敬。向十方三寶。翹勤禮拜。

一心頂禮過去世。盡過去際。一切諸佛。

一心頂禮未來世。盡未來際。一切諸佛。

一心頂禮現在世。盡現在際。一切諸佛。

一心頂禮過去世盡過去際一切尊法。

一心頂禮未來世盡未來際一切尊法。

一心頂禮現在世盡現在際一切尊法。

一心頂禮過去世盡過去際一切賢聖。

一心頂禮未來世盡未來際一切賢聖。

一心頂禮現在世盡現在際一切賢聖。

各一禮已。次復謙下恭敬。膝輪著地。對佛像前。合掌請師。

惟願大德哀愍授我菩薩淨戒。

請已。專念一境。長養淨心。作是思惟。我今不久當得無盡無量無上大功德藏。爾時戒師應問言。

善男子聽。汝是菩薩不。答言是。發菩提願未。答言已發。

善男子聽。汝等今者欲於我所受諸菩薩一切學處

受諸菩薩一切淨戒。謂律儀戒。攝善法戒。饒益有情

戒。如是學處。如是淨戒。過去一切菩薩已具。未來一

切菩薩當具。普於十方現在一切菩薩今具。於是學

處。於是淨戒。過去一切菩薩已學。未來一切菩薩當

學。普於十方現在一切菩薩今學。汝能受不。答言能受。

如是三問答已。次應語言。

佛子。應受四不壞信。此下歸依悔過發願三節。皆應自說。如或不能。師應教授。

從今時盡未來際身。歸依佛。歸依法。歸依賢聖僧。歸

依正法戒。如是三說。

佛子。次應悔三世罪。

若過去身口意十惡罪。願畢竟不起。盡未來際。若現

在身口意十惡罪。願畢竟不起。盡未來際。若未來身

口意十惡罪。願畢竟不起。盡未來際。如是三說。

佛子。如是悔過已。三業清淨。如淨瑠璃。內外明照。

次應發四弘誓願。

衆生無邊誓願度。煩惱無盡誓願斷。

法門無量誓願學。佛道無上誓願成。如是三說。

佛子。既發弘誓願竟。我當為汝啟白三寶。證明受

戒。汝應一心善聽。作意諦思。當知初番白竟。十方

世界妙善戒法。由心業力。悉皆震動。二番白竟。十

方世界妙善戒法。如雲如蓋。覆汝頂上。三番白竟。

十方世界妙善戒法。從汝頂門。流入身心。充滿正

報。盡未來際。永為佛種。此是無作戒體。無漏色法。

由汝增上善心之所感得。是故汝應至誠頂受。

爾時受戒者。胡跪如故。戒師起座。對佛像前。普於十方現在三寶。恭敬供養。頂禮合掌。作如是白。

仰啟十方無邊無際諸世界中。諸佛菩薩。今於此中。

現有某甲菩薩。於我某甲菩薩所。乃至三說受菩薩

戒。我為作證。惟願十方無邊無際諸世界中。諸佛菩

薩。第一真聖。於現不現。一切時處。一切有情。皆現覺

者於此某甲受戒菩薩亦為作證。如是三說。

次應復座為說
十重戒相勸持。

善男子聽菩薩有十無盡戒若有犯者非菩薩行

失四十二賢聖法汝應諦受

從今身至佛身於其中間不得故殺生能持不。能。答言

從今身至佛身於其中間不得故偷盜能持不。能。答言

從今身至佛身於其中間不得故婬欲能持不。能。答言

從今身至佛身於其中間不得故妄語能持不。能。答言

從今身至佛身於其中間不得故酤酒能持不。能。答言

從今身至佛身於其中間不得故說在家出家菩薩

罪過能持不。能。答言

從今身至佛身於其中間不得故自讚毀他能持不。

能。答言

從今身至佛身於其中間不得故慳能持不。能。答言

從今身至佛身於其中間不得故瞋能持不。能。答言

從今身至佛身於其中間不得故謗三寶藏能持不。

能。答言

佛子受十無盡戒已其受者過度四魔越三界苦

從生至生不失此戒常隨行人乃至成佛當知如

是菩薩所受淨戒於餘一切所受淨戒最勝無上

無量無邊大功德藏之所隨逐。第一最上善心意樂之所發起。普能除滅於一切有情一切種惡行。一切別解脫律儀。於此菩薩律儀戒。百分不及一。千分不及一。數分計分。算分喻分。乃至鄔波尼殺曇分。亦不及一。攝受一切大功德故。

受授菩薩俱起頂禮十方三寶清眾同稱。

受戒功德殊勝行。

無邊勝福皆迴向。

普願沈溺諸眾生。

速往無量光佛刹。

十方三世一切佛。

諸尊菩薩摩訶薩。

摩訶般若波羅密。

禮三寶畢。受戒菩薩次應禮謝戒師及諸大眾恭敬而退。

重定授菩薩戒法

跋語

竊觀比丘受戒律有定式。五部雖殊。大同小異。故應專遵四分。削後竄之繁文。菩薩受法。經論各異。梵網瓔珞。地持善戒。以及心地觀等。被機既別。詳略互殊。是以制旨教行等。各抒己意。增設科條。雖辭美意詳。並殫其致。然或義因文隱。反不若經論之痛快直捷。今梵網受法。已失其傳。僅存影略。惟地持瓔珞的可依承。敬酌三家。會成一式。庶俾詳簡適中。而授者受者。皆得明白簡易。以免紊雜之

過耳。

時

崇禎四年辛未季秋古吳智旭謹識

比丘

伴霞
維靜

施洋銀

二圓

其刻此卷連圈計字一千

八百四十二箇

同治十三年春三月金陵刻經處識

學菩薩戒法

明菩薩戒弟子古吳智旭述

佛前自誓受戒。肇於梵網。詳於地持瓔珞等經。今參以諸經行法。總出十意。一嚴道場。二淨三業。三結界。四修供養。五讚禮歸依。六悔除惡罪。七啟白請證。八正誦戒經。九發誓禮佛。十發願迴向。

一嚴道場

住於靜室。設盧舍那像。或釋迦像。或但畫像。亦得。然須有佛像。不得單供菩薩像也。懸旛然燈香華。飲食以用供養。或一七日。二三七日。乃至一年三

年晝夜六時勤而行之。若不能日日設供。初日決不可闕。或見好相爲期。或但發好心。終身行之。若晝夜共三徧。若二若一。但令相續不斷。嚴護不侵。必爲諸佛攝受矣。

二淨三業

若出家人。先須受具足戒。或沙彌戒。清淨無犯。若在家人。先須全受五戒。無有毀犯。次應發廣大菩提心。誓欲紹隆佛種。盡度一切衆生。方堪受菩薩戒。應於靜處。澡漱清淨。著如法服。攝心正念。口無雜言。但當殷勤存想三寶。求其哀祐。

三結界

行者於建首日。未禮敬前。當齊修行處。如法結界。以摩訶悉怛哆般怛羅。無上神咒。加持淨水。灑著四方爲界。或終身行之者。無定壇場。但於每時。先遶像。經行誦咒一徧。亦得。經云。有此咒地。十二由旬。成結界地也。若在家人。不能誦全咒者。用大悲神咒亦可。

四修供養

行者依法結界已。至尊像前。先敷具。拱立。至心運想十方三世無窮無盡一切三寶。起深信解。如對

目前口當唱云。

一切恭敬。

一心頂禮十方常住三寶。禮已。胡跪。添香。捧華。作是唱云。

嚴持香華。如法供養。

願此香華雲徧滿十方界。一一諸佛土。無量香莊嚴。

具足菩薩道。成就如來香。散華畢。次復想云。

我此香華徧十方。以為微妙光明臺。諸天音樂天。

寶香諸天肴膳天寶衣。不可思議妙法塵。一一塵。

出一切塵。一一塵。出一切法。旋轉無礙。互莊嚴。徧。

至十方三寶前。十方法界三寶前。悉有我身修供。

養一一皆悉徧法界。彼彼無雜無障礙。盡未來際。

作佛事。普熏法界諸衆生。蒙熏皆發菩提心。同入。

無生證佛智。想已起立。唱云。

供養已。一切恭敬。拜一

五讚禮歸依

次復胡跪合掌。作是唱云。

如來妙色身。世間無與等。無比不思議。是故今敬禮。

如來色無盡。智慧亦復然。一切法常住。是故我歸依。

善調心過惡。及與身四種。到不思議地。故我今敬禮。

知諸爾燄法。智身無罣礙。於法無忘失。故我今敬禮。

稽首過無量。稽首無倫等。稽首法自在。稽首超思惟。
哀愍覆護我。令法種增長。逮及最後身。常在如來前。
我所修福業。此世及餘生。由斯善根力。願佛恆攝受。
讚已。一叩首。次起立。唱云。

一心頂禮過去世。盡過去際一切諸佛。

拜下想云。能禮所禮性空寂。感應道交難思議。我
此道場如帝珠。一切諸佛影現中。我身影現諸佛
前。爲求大戒接足禮。至禮賢聖。卽以諸佛二字改
作賢聖二字。

一心頂禮未來世。盡未來際一切諸佛。

一心頂禮現在世。盡現在際一切諸佛。
一心頂禮過去世。盡過去際一切尊法。
想云。真空法性如虛空。常住法寶難思議。我身影

現法寶前。一心如法歸命禮。

一心頂禮未來世。盡未來際一切尊法。

一心頂禮現在世。盡現在際一切尊法。

一心頂禮過去世。盡過去際一切賢聖。

一心頂禮未來世。盡未來際一切賢聖。

一心頂禮現在世。盡現在際一切賢聖。

各一禮已。胡跪唱言。

我弟子某甲。從今時盡未來際身。歸依佛。歸依法。歸依賢聖僧。歸依正法戒。三說已。一叩首。

六悔除惡罪

應當緣念無始已來。迷自本心。無惡不造。深自慚愧。永斷相續。懇切自責。至心唱云。

我弟子某甲。若過去身口意十惡罪。願畢竟不起。盡未來際。若現在身口意十惡罪。願畢竟不起。盡未來際。若未來身口意十惡罪。願畢竟不起。盡未來際。

三說已。一叩首。仍默想云。我昔所造諸惡業。皆由無始貪瞋癡。從身語意之所生。一切我今皆懺悔。

想已。自念罪障已滅。身心清淨。猶如瑠璃。

七啟白請證

仍前胡跪。至心白云。

仰啟十方一切如來。已入大地諸菩薩衆。我今欲於十方世界。佛菩薩所。誓受一切菩薩學處。誓受一切菩薩淨戒。謂律儀戒。攝善法戒。饒益有情戒。如是學處。如是淨戒。過去一切菩薩已具。未來一切菩薩當具。普於十方現在一切菩薩今具。於是學處。於是淨戒。過去一切菩薩已學。未來一切菩薩當學。普於十方現在一切菩薩今學。惟願十方無邊無際諸世界。

中諸佛菩薩第一真聖於現不現一切時處一切有情皆現覺者於弟子某甲受菩薩戒爲作證明

三說已一叩首若作恆課者一說亦得

八正誦戒經

或胡跪像前或於像側設一小座就坐而誦或能背熟戒經經行誦之亦得仍須添香致敬先應合掌三稱

南無梵網教主盧舍那佛

無上甚深微妙法

百千萬億劫難遇

我今見聞得受持

願解如來真實義

二次誦梵網經心地品或全誦上下二卷或但誦下卷或以下卷分作二時三時乃至六時隨力誦之誦時當令字句分明勿有差脫

九發誓禮佛

經畢仍須添香致敬胡跪像前先三稱

南無本師釋迦牟尼佛

次發誓云

如是戒品我今於一切三寶前誓願受持修學盡未來際不復捨離假使持戒因緣百千萬劫恆受困苦誓不以苦故退失今日道心假使破戒因緣百千萬劫恆受安樂誓不以樂故退失今日道心以此學戒

功德願我及衆生從無始世來所作衆罪盡得消滅。若一切衆生所有定業當受報者我皆代受徧微塵國。歷諸惡道。經微塵劫。備嘗衆苦。歡喜忍受。終無厭悔。令彼衆生先成佛道。我所發願。真實不虛。願十方三寶現爲我證。手摩我頭。衣覆我體。甘露灌頂。光明照身。令我道心。日夜增長。入諸三昧。得陀羅尼。文殊智海。念念清淨。普賢行海。念念圓成。命終之後。生諸佛前。證不思議解脫境界。普能遊戲。出入塵勞。盡度迷流。同登覺岸。虛空有盡。我願無窮。歸命頂禮一切三寶。

一心頂禮梵網教主盧舍那佛。二禮

一心頂禮本師釋迦牟尼佛。

一心頂禮西方極樂世界阿彌陀佛。

一心頂禮藥師瑠璃光佛。

一心頂禮過去七佛。十方十佛。

一心頂禮三十五佛。五十三佛。百七十佛。

一心頂禮莊嚴劫千佛。賢劫千佛。星宿劫千佛。

一心頂禮盡十方三世一切諸佛。

一心頂禮梵網經菩薩心地品微妙尊法。三禮

一心頂禮大小乘毘奈耶藏及十方三世一切尊法。

- 一心頂禮玄通華光主菩薩摩訶薩。
- 一心頂禮華光王大智明菩薩摩訶薩。
- 一心頂禮藥王菩薩藥上菩薩摩訶薩。
- 一心頂禮觀世音菩薩大勢至菩薩摩訶薩。
- 一心頂禮地藏菩薩金剛藏菩薩虛空藏菩薩摩訶薩。

- 一心頂禮文殊師利菩薩普賢菩薩摩訶薩。
- 一心頂禮一生補處彌勒菩薩摩訶薩。
- 一心頂禮十方三世一切菩薩摩訶薩。
- 一心頂禮優波離尊者大迦葉尊者阿難陀尊者一

切緣覺聲聞賢聖僧

觀想偈如前應知。若作常課於道行疲病等時不能禮拜者。隨於四威儀中。但瞑目運心作禮拜想。其功德與五體投地無異。

十發願迴向

- 禮佛竟仍須添香致敬。胡跪合掌。說是弘願。
- 稽首三身圓滿尊。
- 一切真如覺性海。
- 稱彼法界等虛空。
- 種種莊嚴大願海。
- 果因交徹不思議。
- 菩薩一切修行海。
- 亦禮阿彌陀如來。
- 觀音勢至及地藏。

我為慈親罔極恩。

徧憫一切衆生界。

發生如實增上心。

修行念佛勝方便。

深信淨土攝受門。

廣大誓願普皆被。

妙戒為舟智慧舵。

方便為帆佛力風。

盡未來際渡衆生。

終不一念捨五濁。

諸佛願海如帝珠。

攝於我願重重現。

我願亦如摩尼王。

諸佛願海悉皆攝。

願輪橫徧於十方。

亦復豎窮於三際。

一切智智之所乘。

故我至心勤修習。

第一願者我發本心為欲上報慈父生我之恩惟願

三寶慈悲力令我無始以來經生慈父咸生淨土速

證菩提能令聞我名者亦得上報父恩 第二願者

我本發心為欲上報悲母養育之恩惟願三寶慈悲

力令我無始以來經生悲母咸生淨土速證菩提能

令聞我名者亦得上報母恩 第三願者願度法界

虛空界一切衆生盡成佛竟我然後方取泥洹 第

四願者願我姪機身心俱斷斷性亦無能令聞我名

者亦得永斷姪根 第五願者願我殺害業習滅盡

無餘能令聞我名者徧生慈力 第六願者願我癡

闇謗三寶業滅盡無餘能令聞我名者正信三寶

第七願者。願我諸不善業。悉得清淨。能令聞我名者。安住梵行。第八願者。願我決生極樂世界。速證無上菩提。分身塵刹。度脫衆生。盡未來際。無有疲厭。第九願者。願我生生世世。不忘本願。於五濁世。善化衆生。第十願者。願我在在處處。弘通正法。無諸魔障。十一願者。願得無量智慧。善能通達一切佛法。十二願者。願得無量辯才。開導羣迷。降伏外道。一切無畏。如師子吼。十三願者。願得無量神通。徧至十方國土。承事一切如來。及善知識。一切海會。無不得與。十四願者。願我能出種種微妙音聲。盡未來

際。讚歎三寶。令諸衆生。知所歸依。十五願者。願能隨意出生種種微妙供養。供養三寶。爲諸衆生。作大福田。十六願者。十方一切衆生。所有功德。我皆隨喜。令其成就。無上菩提。十七願者。十方如來。成正覺時。我先勸請。轉大法輪。開示衆生。無上覺路。十八願者。十方如來。般涅槃時。我悉勸請。莫入涅槃。常住世間。饒益含識。十九願者。十方如來。會中。推我爲大法王子。佛於一切海會。讚我功德。智慧。慈悲。願力。如觀世音。如地藏王。等無有異。二十願者。願以大悲光明。照諸地獄。觸我光者。應時變諸苦事。成勝

妙樂。二十一願者。願以大悲光明。照諸餓鬼。觸我光者。應時捨餓鬼身。得淨土生。二十二願者。願以大悲光明。照諸畜生。蒙我光者。離諸怖畏。捨身之後。得淨土生。二十三願者。願以大悲光明。照諸鬼神。蒙我光者。悉捨瞋心。開悟佛道。捨諸醜陋。得清淨身。二十四願者。願以大悲光明。照諸苦惱眾生。蒙我光者。疾病消除。六根具足。一切危難。皆解脫。無量恐怖。悉捐除。無病延年。發菩提意。若臨命終。卽生淨土。二十五願者。願以大悲光明。照觸有形無形。有想無想。及諸魔外。令其身心。捨諸邪見。通達佛乘。二

十六願者。願以大悲光明。照觸人天。令其不迷欲樂。及欣厭定。各各勤求。無上菩提。二十七願者。願以大悲光明。照諸聲聞緣覺。令其捨無爲證。速趨佛乘。二十八願者。願以大悲音聲。開示一切眾生。令諸眾生。決定明悟。不戀三界。不樂餘乘。惟求無上菩提。二十九願者。願以大悲神力。隨順眾生種種所求。恆令如願。俾於我法。生深信心。三十願者。我以救度眾生故。願於十方。現作佛身。或現淨土。攝取眾生。莊嚴殊勝。踰於極樂。或現穢土。化導眾生。方便無量。調伏惡友。三十一願者。我以救度眾生故。願於隨

類現身。一一類中種族尊勝威德自在。令諸同類恭敬愛慕。如所教誨。直至菩提。三十二願者。一切無佛法處。一切法滅處。一切佛法不能行處。我誓以大悲方便。現身於中。隱顯大化。爲長夜燈。救拔沈冥。出於苦海。三十三願者。願我恆於衆生。餓渴之時。現作飲食。疾疫之時。現作藥草。寒凍之時。現作衣服。熱惱之時。現作涼風。險阻之處。現作津梁。乃至衆生一切所須。皆現作之。令諸衆生。若服若食。若倚若履。咸得安樂。發菩提心。三十四願者。若諸衆生。樂求佛乘。聞我名已。不捨肉身。得佛菩提。證於究竟。三十

五願者。若諸菩薩。莊嚴佛土。聞我名已。其國勝妙。踰於極樂。欲現穢土。則得無量方便。善化剛強。難化衆生。三十六願者。若諸衆生。欲見諸佛淨土。聞說法音。我願令彼皆得見聞。三十七願者。若諸衆生。欲往無數世界。供養三寶。願令一念之間。普得周徧。三十八願者。若諸衆生。欲生諸佛淨土。聞我名號。卽得隨願往生。三十九願者。若諸衆生。同我誓願。速得無量智慧方便。威德自在。四十願者。若有衆生。樂求小乘。我願令彼速登聖果。卽便迴心入菩薩乘。四十一願者。願諸十方修行菩薩。聞我名號。直至

菩提永無魔事。四十二願者。願諸十方邪魔外道。聞我名號。卽捨邪見。同歸正覺。四十三願者。若有衆生。身具五逆十惡。四棄八棄。當墮大地獄中。我願以大悲心力。使知求哀懺悔。隨現勝妙色身。至其目前。摩頂安慰。令彼罪根永拔。發菩提心。四十四願者。若有衆生。或謗我法。或詈我名。彼雖障重。我誓以平等大慈悲力。令其滅惡。速趨菩提。四十五願者。願我慈眼。最極清淨。普視盡虛空界。乃至極苦之處。悉令安樂。極惡衆生。悉令賢善。四十六願者。願我印手。最極莊嚴。於念念中。出生一切諸供養雲。諸珍

寶雲。諸衣服雲。諸衆具雲。諸飲食雲。諸醫藥雲。諸三昧雲。諸總持雲。諸辯才雲。諸光照雲。徧虛空界。利益衆生。盡未來際。無有斷絕。四十七願者。願我名號。最極高遠。盡十方界。靡不周徧。乃至法滅之處。我名不滅。恆令衆生。若聞若稱。悉得解脫。四十八願者。願我色身。最極微妙。以不可說不可說佛刹極微塵數。大人之相。而自莊嚴。一一相。有不可說不可說佛刹極微塵數。隨形好。一一好。有不可說不可說佛刹極微塵數。光明。一一光明。皆作不可說不可說佛刹極微塵數。嚴飾國界。皆演不可說不可說佛刹極

微塵數聲宣揚妙法。皆發不可說不可說佛刹極微塵數。香普熏一切。皆出不可說不可說佛刹極微塵數。上妙飲食。俱養一切。皆雨不可說不可說佛刹極微塵數。衣服眾具。普施一切。皆現不可說不可說佛刹極微塵數。化佛教化一切。一一化佛。皆有不可說不可說佛刹極微塵數。諸化菩薩。以為眷屬。一一菩薩。皆有不可說不可說佛刹極微塵數。殊勝莊嚴。一一莊嚴。皆作不可說不可說佛刹極微塵數。廣大佛事。一一佛事。皆於不可說不可說佛刹極微塵數。世界。利益眾生。其有眾生。見一佛事。則得見我微妙色。

身見我身者。則能與我平等。則能速得成佛。願我臨欲命終時。盡除一切諸障礙。面見彼佛阿彌陀。即得往生安樂刹。我既往生彼國已。現前成就此大願。一切圓滿盡無餘。利樂一切眾生界。彼佛眾會咸清淨。我時於勝蓮華生。親覩如來無量光。現前授我菩提記。蒙彼如來授記已。化身無數百俱胝。智力廣大徧十方。普利一切眾生界。乃至虛空世界盡。眾生及業煩惱盡。

如是一切無盡時。

我願究竟恆無盡。

我此廣大殊勝願。

無邊勝福皆迴向。

普願沈溺諸衆生。

速往無量光佛刹。

十方三世一切佛。

諸尊菩薩摩訶薩。

摩訶般若波羅密。

次起唱
三自歸

自歸依佛。當願衆生。體解大道。發無上心。

自歸依法。當願衆生。深入經藏。智慧如海。

自歸依僧。當願衆生。統理大衆。一切無礙。

和南聖衆。

發願之法。各隨所樂。或樂學阿彌陀佛四十八願。

藥師如來十二大願。及普賢菩薩十願。王等。隨意

用之。未必專令依此願也。又或隨自意樂。欲發種

種諸願。或廣或略。亦無不可。但令與四弘誓願相

合。斯無過矣。善學者。幸自擇焉。

此學戒法。定於戊辰之夏。業已刊入毘尼後集。

今癸未夏日。重更一二。附於梵網合註之後。此

後當以是為準。云。藕益智旭敬識。

學菩薩戒法

長沙黃上達施錢十千六百文敬刻此卷連圈計

字五千二百六十八箇

同治十三年夏四月金陵刻經處識

藥師如來十二大願
 第一願 自願
 第二願 自願
 第三願 自願
 第四願 自願
 第五願 自願
 第六願 自願
 第七願 自願
 第八願 自願
 第九願 自願
 第十願 自願
 第十一願 自願
 第十二願 自願

菩薩戒本經 出地持戒品中

慈氏菩薩說

北涼天竺三藏法師曇無讖第二譯

歸命盧舍那 十方金剛佛 亦禮前論主

當覺慈氏尊 今說三聚戒 菩薩咸共聽

戒如大明燈 能消長夜闇 戒如真寶鏡

照法盡無遺 戒如摩尼珠 雨物濟貧窮

離世速成佛 唯此法為最 是故諸菩薩

應當勤護持

諸大士。此四波羅夷法。是菩薩摩得勒伽和合說。

若菩薩爲貪利故自歎已德毀訾他人是名第一波羅夷處法。

若菩薩自有財物性慳惜故貧苦衆生無所依怙來求索者不起悲心給施所求有欲聞法悋惜不說是名第二波羅夷處法。

若菩薩瞋恚出麤惡言意猶不息復以手打或加杖石殘害恐怖瞋恨增上犯者求悔不受其懺結恨不捨是名第三波羅夷處法。

若菩薩謗菩薩藏說相似法熾然建立於相似法若心自解或從他受是名第四波羅夷處法。

諸大士已說四波羅夷法若菩薩起增上煩惱犯一法失菩薩戒應當更受今問諸大士是中清淨不

三說

諸大士是中清淨默然故是事如是持。

諸大士此菩薩衆多突吉羅法是菩薩摩得勒伽和合說。

若菩薩住律儀戒於一日一夜中若佛在世若佛塔廟若法若經卷若菩薩修多羅藏若菩薩摩得勒伽藏若比丘僧若十方世界大菩薩衆若不少多供養乃至一禮乃至不以一偈讚歎三寶功德乃至不能

一念淨心者。是名爲犯衆多犯。若不恭敬。若懶惰。若懈怠。犯。是犯染汗起。若忘誤。犯非染汗起。不犯者。入淨心地。菩薩如得不壞淨比丘。常法供養佛法僧寶。若菩薩多欲。不知足。貪著財物。是名爲犯衆多犯。是犯染汗起。不犯者。爲斷彼故。起欲方便攝受對治。性利煩惱更數數起。

若菩薩見上座有德。應敬同法者。憍慢瞋恨。不起恭敬。不讓其座。問訊請法。悉不酬答。是名爲犯衆多犯。是犯染汗起。若懶惰懈怠。若無記心。若忘誤。犯非染汗起。不犯者。若重病。若亂心。若眠作覺想。問訊請法。

悉不答者。是名不犯。若上座說法。及決定論時。若自說法。若聽法。若自決定論時。若說法。衆中。若決定論衆中。不禮不犯。若護說者心。若以方便令彼調伏。捨離不善。修習善法。若護僧制。若護多人意。

若菩薩檀越來請。若至自舍。若至寺內。若至餘家。若施衣食種種衆具。菩薩以瞋慢心。不受不往。是名爲犯衆多犯。是犯染汗起。不犯者。若病。若無力。若狂。若遠處。若道路恐怖難。若知不受。令彼調伏。捨惡住善。若先受請。若修善法。不欲暫廢。爲欲得聞。未曾有法。饒益之義。及決定論。若知請者爲欺惱故。若護多人。

嫌恨心故。若護僧制。

若菩薩有檀越以金銀真珠摩尼琉璃種種寶物奉施菩薩。菩薩以瞋慢心違逆不受。是名爲犯衆多犯。是犯染汙起。捨衆生故。若懶惰懈怠。犯非染汙起。不犯者。若狂。若知受已。必生貪著。若知受已。施主生悔。若知受已。施主生惑。若知受已。施主貧惱。若知是物是三寶許。若知是物是劫盜得。若知受已。多得苦惱。所謂殺縛謫罰奪財呵責。

若菩薩衆生往至其所欲得聞法。若菩薩瞋恨慳嫉。不爲說法者。是名爲犯衆多犯。是犯染汙起。若懶惰懈怠。犯非染汙起。不犯者。若外道求短。若重病。若狂。若知不說令彼調伏。若所修法未善通利。若知前人不能敬順。威儀不整。若彼鈍根。聞深妙法。生怖畏心。若知聞已。增長邪見。若知聞已。毀訾退沒。若彼聞已向惡人說。

若菩薩於凶惡犯戒衆生。以瞋恨心。若自捨。若遮他。令捨。不教化者。是名爲犯衆多犯。是犯染汙起。若懶惰懈怠。若忘遮他。犯非染汙起。何以故。菩薩於惡人所起慈悲心。深於善人。不犯者。若狂。若知不說令彼調伏如前說。若護他心。若護僧制。

若菩薩。於如來波羅提木叉中。毗尼建立遮罪。護衆生故。令不信者信。信者增廣。同聲聞學。何以故。聲聞者。乃至自度。乃至不離護他。令不信者信。信者增廣。學戒。何況菩薩第一義度。又復遮罪住少利少作少方便。世尊爲聲聞建立者。菩薩不同學此戒。何以故。聲聞自度捨他。應住少利少作少方便。非菩薩自度度他。應住少利少作少方便。菩薩爲衆生故。從非親里婆羅門居士所求百千衣。及白忤與當觀施主堪與不堪。隨施應受。如衣鉢亦如是。如衣鉢如是。自乞縷。令非親里織師織。爲衆生故。應畜積憍奢耶臥具。

坐具。乃至百千。乃至金銀百千。亦應受之。如是等住少利少作少方便。聲聞遮罪。菩薩不共學。住菩薩律儀戒。爲諸衆生。若嫌恨心。住少利少作少方便者。是名爲犯衆多犯。是犯染汙起。若懶惰懈怠。住少利少作少方便。犯非染汙起。

若菩薩身口諂曲。若現相。若毀訾。若因利求利。住邪命法。無慚愧心。不能捨離。是名爲犯衆多犯。是犯染汙起。不犯者。若斷彼故。起欲方便。煩惱增上。更數數起。

若菩薩掉動。心不樂靜。高聲嬉戲。令他喜樂。作是因

緣是名爲犯衆多犯。是犯染汙起。若忘誤犯非染汙起。不犯者。爲斷彼故。起欲方便。如前說。又不犯者。他起嫌恨。欲令止故。若他愁憂。欲令息故。若他性好戲。爲攝彼故。欲斷彼故。爲將護故。若他疑菩薩嫌恨。違背。和顏戲笑。現心淨故。

若菩薩作如是見。如是說言。菩薩不應樂涅槃。應背涅槃。不應怖畏煩惱。不應一向厭離。何以故。菩薩應於三阿僧祇劫。久受生死。求大菩提。作如是說者。是名爲犯衆多犯。是犯染汙起。何以故。聲聞深樂涅槃。畏厭煩惱。百千萬倍不及菩薩深樂涅槃。畏厭煩惱。

謂諸聲聞。但爲自利。菩薩不爾。普爲衆生。彼習不染汙心。勝阿羅漢。成就有漏。離諸煩惱。

若菩薩不護不信之言。不護譏毀。亦不除滅。若實有過惡。不除滅者。是名爲犯衆多犯。是犯染汙起。實無過惡。而不除滅。非染汙起。不犯者。若外道誹謗。及餘惡人。若出家乞食。修善因緣。生他譏毀。若前人若瞋若狂。而生譏毀。

若菩薩觀衆生。應以苦切之言。方便利益。恐其憂惱。而不爲者。是名爲犯衆多犯。是犯非染汙起。不犯者。觀彼現在。少所利益。多起憂惱。

若菩薩罵者報罵。瞋者報瞋。打者報打。毀者報毀。是名爲犯衆多犯。是犯染汙起。

若菩薩侵犯他人。或雖不犯。令他疑者。卽應懺謝。嫌恨輕慢。不如法懺謝。是名爲犯衆多犯。是犯染汙起。若懶惰懈怠。犯非染汙起。不犯者。若以方便令彼調伏。若彼欲令作不淨業。然後受者。不謝無罪。若知彼人性好鬪訟。若悔謝者。增其瞋怒。若知彼和忍。無嫌恨心。恐彼慙恥。不謝無罪。

若菩薩他人來犯。如法悔謝。以嫌恨心。欲惱彼故。不受其懺。是名爲犯衆多犯。是犯染汙起。若不嫌恨。性

不受懺。是犯非染汙起。不犯者。若以方便令彼調伏。如前說。若彼不如法悔。其心不平。不受其懺。無罪。

若菩薩於他起嫌恨心。執持不捨。是名爲犯衆多犯。是犯染汙起。不犯者。爲斷彼故。起欲方便。如前說。

若菩薩爲貪奉事。畜養眷屬者。是名爲犯衆多犯。是犯染汙起。不犯者。無貪心畜。

若菩薩懶惰懈怠。耽樂睡眠。若非時。不知量。是名爲犯衆多犯。是犯染汙起。不犯者。若病。若無力。若遠行疲極。若爲斷彼故。起欲方便。如前說。

若菩薩以染汙心。論說世事經時者。是名爲犯衆多

犯。是犯染汙起。若忘誤經時。犯非染汙起。不犯者。見他聚話。護彼意故。須臾暫聽。若暫答他問。未曾聞事。若菩薩欲求定心。嫌恨憍慢。不受師教。是名爲犯衆多犯。是犯染汙起。若懶惰懈怠。犯非染汙起。不犯者。若病。若無力。若知彼人作顛倒說。若自多聞有力。若先已受法。

若菩薩起五蓋心。不開覺者。是名爲犯衆多犯。是犯染汙起。不犯者。爲斷彼故。起欲方便。如前說。若菩薩見味禪。以爲功德者。是名爲犯衆多犯。是犯染汙起。不犯者。爲斷彼故。起欲方便。如前說。

若菩薩如是見。如是說言。菩薩不應聽聲聞經法。不應受。不應學。菩薩何用聲聞法爲。是名爲犯衆多犯。是犯染汙起。何以故。菩薩尙聽外道異論。况復佛語。不犯者。專學菩薩藏。未能周及。

若菩薩於菩薩藏。不作方便。棄捨不學。一向修習聲聞經法。是名爲犯衆多犯。是犯非染汙起。

若菩薩於佛所說。棄捨不學。反習外道邪論。世俗經典。是名爲犯衆多犯。是犯染汙起。不犯者。若上聰明。能速受學。若久學不忘。若思惟知義。若於佛法具足。觀察得不動智。若於日日常以二分受學佛經。一分

外典。是名不犯。如是菩薩善於世典。外道邪論。愛樂不捨。不作毒想。是名爲犯衆多犯。是犯染汙起。

若菩薩聞菩薩法藏甚深義。真實義。諸佛菩薩無量神力。誹謗不受。言非利益。非如來說。是亦不能安樂衆生。是名爲犯衆多犯。是犯染汙起。或自心不正思惟。故謗。或隨順他故謗。是菩薩聞第一甚深義。不生解心。是菩薩應起信心。不諂曲心。作是學。我本不是。盲無慧目。如來慧眼。如是隨順說。如來有餘說。云何起謗。是菩薩自處無知處。如是如來現知見法。正觀正向。不犯。非不解謗。

若菩薩以貪恚心。自歎已德。毀訾他人。是名爲犯衆多犯。是犯染汙起。不犯者。若輕毀外道。稱揚佛法。若以方便。令彼調伏。如前說。又不犯者。令不信者信。信者增廣。

若菩薩聞說法處。若決定論處。以憍慢心。瞋恨心。不往聽者。是名爲犯衆多犯。是犯染汙起。若懶惰懈怠。犯非染汙起。不犯者。若不解。若病。若無力。若彼顛倒說法。若護說者心。若數數聞。已受持。已知義。若多聞。若聞持。若如說行。若修禪定。不欲暫廢。若鈍根難悟。難受難持。不往者。皆不犯。

若菩薩輕說法者。不生恭敬。嗤笑毀訾。但著文字。不依實義。是名爲犯衆多犯。是犯染汙起。

若菩薩住律儀戒。見衆生所作。以瞋恨心。不與同事。所謂思量諸事。若行路。若如法興利。若田業。若牧牛。若和諍。若吉會。若福業。不與同者。是名爲犯衆多犯。是犯染汙起。若懶惰懈怠。犯非染汙起。不犯者。若病。若無力。若彼自能辦。若彼自有多伴。若彼所作事。非法非義。若以方便令彼調伏。如前說。若先許他。若彼有怨。若自修善業。不欲暫廢。若性闇鈍。若護多人意。若護僧制。不與同者。皆不犯。

若菩薩見羸病人。以瞋恨心。不往瞻視。是名爲犯衆多犯。是犯染汙起。若懶惰懈怠。犯非染汙起。不犯者。若自病。若無力。若教有力。隨順病者。若知彼人自有眷屬。若彼有力。自能經理。若病數數發。若長病。若修勝業。不欲暫廢。若闇鈍。難悟。難受。難持。難緣中住。若先看他病。如病。窮苦亦爾。

若菩薩見衆生造今世後世惡業。以嫌恨心。不爲正說。是名爲犯衆多犯。是犯染汙起。不犯者。若自無智。若無力。若使有力者說。若彼自有力。若彼自有善知識。若以方便令彼調伏。如前說。若爲正說。於我憎恨。

若出惡言。若顛倒爲。若無愛敬。若復彼人性弊。隴戾。若菩薩受他恩惠。以嫌恨心。不以答謝。若等若增酬報彼者。是名爲犯衆多犯。是犯染汙起。若懶惰懈怠。犯非染汙起。不犯者。若作方便而無力。若以方便令彼調伏。如前說。若欲報恩而彼不受。

若菩薩見諸衆生有親屬難財物難。以嫌恨心。不爲開解除其憂惱。是名爲犯衆多犯。是犯染汙起。若懶惰懈怠。犯非染汙起。不犯者。如前同事中說。

若菩薩有求飲食衣服。以瞋恨心。不能給施。是名爲犯衆多犯。是犯染汙起。若懶惰懈怠。犯非染汙起。不

犯者。若自無。若求非法物。若不益彼物。若以方便令彼調伏。如前說。若彼犯王法。護王意故。若護僧制。若菩薩攝受徒衆。以瞋恨心。不如法教授。不能隨時從婆羅門居士所求衣食臥具醫藥房舍。隨時供給。是名爲犯衆多犯。是犯染汙起。若懶惰懈怠。放逸犯非染汙起。不犯者。若以方便令彼調伏。如前說。若護僧制。若病。若無力。若使有力者說。若彼有力。多知識大德。自求衆具。若曾受教。自己知法。若外道竊法。不能調伏。

若菩薩以嫌恨心。不隨他者。是名爲犯衆多犯。是犯

染汙起。若懶惰懈怠。犯非染汙起。不犯者。若彼欲爲不如法事。若病。若無力。若護僧制。若彼雖如法。能令多人起非法事。若伏外道故。若以方便令彼調伏。若菩薩。知他衆生有實功德。以嫌恨心。不向人說。亦不讚歎。有讚歎者。不唱善哉。是名爲犯衆多犯。是犯染汙起。若懶惰懈怠。放逸。犯非染汙起。不犯者。知彼少欲。護彼意故。若病。若無力。若以方便令彼調伏。若護僧制。若令彼人起煩惱。起溢喜。起慢。起非義。除此諸患故。若實功德。似非功德。若實善說。似非善說。若爲摧伏外道邪見。若待說竟。

若菩薩。見有衆生。應呵責者。應折伏者。應罰黜者。以染汙心。不呵責。若呵責。不折伏。若折伏。不罰黜。是名爲犯衆多犯。是犯染汙起。若懶惰懈怠。放逸。犯非染汙起。不犯者。彼不可治。不可與語。難可教誨。多起嫌恨。若觀時。若恐因彼起鬪。諍相違。若相言訟。若僧諍。若壞僧。若彼不諂曲。有慙愧心。漸自改悔。

若菩薩。成就種種神力。應恐怖者。而恐怖之。應引接者。而引接之。欲令衆生消信。施故。不以神力恐怖。引接者。是名爲犯衆多犯。是犯非染汙起。不犯者。若彼衆生。更起染著。外道謗聖。成就邪見。一切不犯。若彼

發狂。若增苦受。

諸大士。已說衆多突吉羅法。若菩薩犯一一法。應作突吉羅懺。若不懺者。障菩薩戒。今問諸大士。是中清淨不。三說

諸大士。是中清淨。默然故。是事如是持。

諸大士。我已說菩薩四波羅夷法。衆多突吉羅法。此是彌勒世尊摩得勒伽和合說律儀戒。攝善法戒。攝衆生戒。此諸戒法。能起菩薩行。能成菩薩道。諸大士。欲發心求阿耨多羅三藐三菩提者。當善護持。若護持者。不起像法。法滅盡想。能令像法實義熾然。能令正法永不滅盡。心得止住。自成佛法。教化衆生。常無勞倦。善業畢竟。速成佛道。

菩薩戒本經

如臯東莞居士施洋銀十圓敬刻此經連圈計字
四千八百九十四個

同治九年夏六月金陵刻經處識

善觀本願
 發善業畢
 五若永不滅盡
 四十八
 三
 二
 一

梵網經懺悔行法

明菩薩戒弟子藕益智旭述

經云若有犯十戒者應教懺悔在佛菩薩形像前
 日夜六時誦十重四十八輕戒苦到禮三世千佛
 若一七日之三七日乃至一年要見好相便得滅
 罪此金口明訓也故知法華方等大悲占察等種
 種行法雖各有滅罪得戒功能而於犯十戒者仍
 須別依梵網行法方便標心不泛所謂如從地倒
 還從地起又此經所明千里無師像前自受但云
 當以七日佛前懺悔得見好相便得戒若不得好

相應二七三七乃至一年要得好相而不云苦到禮三世千佛蓋大意與瓔珞地持之自誓受戒同耳故向年已曾述學戒法今則特爲受菩薩戒之後犯十重者別明懺儀俾依三世諸佛出罪既見好相則戒體完復雖於比丘法中不任僧用而或爲菩薩沙彌或爲菩薩優婆塞可無慚德且密默進道直證無生亦非分外事矣其或八戒五戒及沙彌戒破根本者依此懺法見好相已既得菩薩大戒亦仍可許進比丘戒若小乘比丘破根本者依此懺悔見好相已密達無生或仍可附與學之

科縱令障深未成感應而永斷相續懇惻求哀必能閉惡趣門植出世種也略爲十意一嚴道場二淨三業三香華供養四讚禮歸依五陳罪悔除六立誓誦戒七苦到禮佛八重修願行九旋遶自歸十坐念實相

一嚴道場

擇取閒靜堂室掃灑清淨中安盧舍那像或釋迦像更安諸菩薩像亦得但須有佛像爲主懸設幢蓋及繒綵旛華種種莊嚴須傾竭已財盡心盡力至誠爲之勿得苟簡亦勿輒化施主必其貧窶無

措方可隨緣求辦。

二淨三業

行者自念。繇夙善故。今生幸得受戒。繇惡障故。而復毀犯。我既毀犯。三世諸佛所設淨戒。現今卽是地獄中人。生大慚愧。生大怖畏。如處溷廁。一心求出。如繫牢獄。一心求脫。不得剎那念世間事。沐浴清淨。著新潔衣。秉志虔誠。口無雜語。如捧滿油。懼其滴墮。獨自專精。勿求伴侶。設有一二同犯戒者。慚懼專志。決定是一。方可同修。必以得見好相爲期。不論一七二七。乃至一年。乃至畢世。心無中懈。

三香華供養

行者初至像前。緣想十方一切三寶。性同虛空。無所不在。我罪障故。不見不知。然諸佛菩薩於我向所作罪。今所修行。悉知悉見。無有遺餘。譬如盲人。在大衆中所作所爲。盲不見衆。衆皆見盲。今我亦爾。無明所覆。妄於清淨法界體中。違犯禁戒。造極重罪。早爲諸佛菩薩所見所知。今日覺悟。慚懼悔過。諸佛菩薩亦必現前。知我見我。先起如是深信。解已於十方三寶。如對目前。敷具竦立。口當唱云。一切恭敬。

一心頂禮十方常住三寶。

總一禮已。燒香捧華。胡跪唱云。

嚴持香華如法供養。

願此香華雲徧滿十方界。供養一切佛尊法諸菩薩。無邊聲聞衆。緣覺獨覺仙。無邊佛土中。受用作佛事。普熏諸衆生。皆發菩提心。

以手散華。次復想云。我此香華徧十方。以爲微妙光明臺。諸天音樂天寶香。諸天肴饍天寶衣。不可思議妙法塵。一一塵出一切塵。一一塵出一切法。旋轉無礙互莊嚴。徧至十方三寶前。十方法界三

寶前。皆有我身修供養。一一皆悉徧法界。彼彼無雜無障礙。盡未來際作佛事。普熏法界諸衆生。蒙熏皆發菩提心。向入無生證佛智。想已起立。唱云。供養已。一切恭敬。一拜

四讚禮歸依

行者修供養。竟一心緣念三寶。真實功德。哀慕眷戀。誓不捨離。胡跪合掌。口出梵音。作是讚歎。

如來妙色身。世間無與等。無比不思議。是故今敬禮。如來色無盡。智慧亦復然。一切法常住。是故我歸依。善調心過惡。及與身四種。到不思議地。故我今敬禮。

知諸爾燄法。智身無罣礙。於法無忘失。故我今敬禮
稽首過無量。稽首無倫等。稽首法自在。稽首超思惟。
哀愍覆護我。令法種增長。逮及最後身。常在如來前。
我所修福業。此世及餘生。由斯善根力。願佛恆攝受。
偈出大寶積經勝鬘
夫人會第四十八
讚已。一叩首。起立唱云。

一心頂禮過去世。盡過去際。一切諸佛。

拜下想云。能禮所禮。性空寂。感應道交。難思議。我
此道場如帝珠。一切諸佛影現中。我身影現諸佛
前。頭面接足歸命禮。至禮賢聖。卽以諸佛二字改

作賢聖二字。

一心頂禮未來世。盡未來際。一切諸佛。

一心頂禮現在世。盡現在際。一切諸佛。

一心頂禮過去世。盡過去際。一切尊法。

想云。真空法性如虛空。常住法寶難思議。我身影
現法寶前。一心如法歸命禮。

一心頂禮未來世。盡未來際。一切尊法。

一心頂禮現在世。盡現在際。一切尊法。

一心頂禮過去世。盡過去際。一切賢聖。

一心頂禮未來世。盡未來際。一切賢聖。

一心頂禮現在世。盡現在際一切賢聖。

各一禮已。胡跪唱云。

我弟子某甲。從今時盡未來際身。歸依佛。歸依法。歸依賢聖僧。歸依正法戒。

三說已。一叩首。隨俯伏想云。我及衆生。無始常爲三業六根重罪所障。不見諸佛。不知出要。但順生死。不知妙理。我今雖知。猶與衆生同爲一切重罪所障。今對舍那十方佛前。普爲衆生。歸命懺悔。惟願加護。令障消滅。

五陳罪悔除

行者歸依及運想竟。次應胡跪合掌。作是唱云。

普爲法界一切衆生。悉願斷除三障。至誠懺悔。

唱已。五體投地。復作是念。我與衆生。無始來今。由

愛見故。內計我人。一外加惡友。二不隨喜他。一毫

之善。三惟徧三業。廣造衆罪。四事雖不廣。惡心徧

布。五晝夜相續。無有間斷。六覆諱過失。不欲人知。

七不畏惡道。八無慚無愧。九撥無因果。十故於今

日。深信因果。一生重慚愧。二生大怖畏。三發露懺

悔。四斷相續心。五發菩提心。斷惡修善。六勤策三

業。翻昔重過。七隨喜凡聖一毫之善。八念十方佛

有大福慧能救拔我及諸衆生從二死海置三德岸九從無始來不知諸法本性空寂廣造衆惡今知空寂爲求菩提爲衆生故廣修諸善徧斷衆惡十惟願盧舍那佛一切世尊慈悲攝受聽我懺悔運此順逆十心已次應胡跪合掌發露犯戒之罪求於十方現住世間諸佛菩薩以大慈悲爲我洗滌令得還淨涕淚號泣作如是說

我弟子某甲至心懺悔我及衆生自性清淨無明所覆不自覺知以是因緣長淪生死今者幸逢正法秉受律儀煩惱亂心復違學處造作如是應隨所犯或殺生或偷盜

或邪姪或妄語依事說之無羞恥法於佛法海便爲永棄應墮阿

毘大地獄中猛火熾然受無量苦乃至備歷惡趣無解脫期如是罪障因果不虛

諸佛菩薩悉知悉見我今發露不敢覆藏起正直心離諂曲行奉對

十方一切如來已入大地諸菩薩衆不惜身命悔過求哀普與衆生洗滌往業從前所作願悉消除自今以後誓不更造惟願

諸佛諸大菩薩以大慈悲憐愍於我拔我罪根施我淨戒

應須具足三說竟起立唱云。

懺悔已禮三寶。一拜

六立願誦戒

行者發露悔除已竟。應想罪無實性。既從緣生。還從緣滅。罪惡既滅。堪住菩薩三聚淨戒。胡跪合掌。作如是白。

仰啟十方一切如來。已入大地。諸菩薩眾。我從今日。盡於未來。誓不退捨。大菩提願。誓不遠離。三聚淨戒。惟願十方無邊無際。諸世界中。諸佛菩薩。第一真聖。於我某甲。重願受持淨戒律儀。咸爲作證。

白已至誠展誦十重四十八輕戒法。於朗誦時。心緣文義。勿令散亂。若一時不能全誦者。分作二時三時。乃至六時。其誦一周亦可。

七苦到禮佛

行者隨誦戒經多少。竟叩首起立。添香致敬。一心緣念三世諸佛。如對目前。殷重懇切。一一頂禮。

一心頂禮梵網教主盧舍那佛。三禮

一心頂禮本師釋迦牟尼佛。

次卽頂禮三世三千諸佛。一佛一禮。或每時百拜。或八十五。或四十三。拜亦可。隨力多少。但令

相續無間。禮一部已未獲好相。再禮一部。乃至十部。百部。直以得見好相為期。又行人色力若康。能於七日中。禮三千佛一周。如是每七一部。相續無間。彌善。設不能者。二七日方得一周。亦可。如是次第。隨意多少。禮竟。次復總禮一拜云。

一心頂禮盡十方三世一切諸佛。

一心頂禮梵網經菩薩心地品微妙尊法。三禮

一心頂禮大小乘毘奈耶藏及十方三世一切尊法。

一心頂禮玄通華光主菩薩華光王大智明菩薩摩訶薩。

訶薩。

一心頂禮一生補處彌勒菩薩及十方三世一切菩薩摩訶薩。

薩摩訶薩。

一心頂禮持律大師優波離尊者及一切聲聞緣覺賢聖僧。

觀想偈如前應知。

八重修願行

行者禮三寶竟。添香致敬。胡跪合掌。隨順彌勒菩薩往昔所修微妙勝行。奉對三寶。如在目前。作是唱云。

我今歸命禮十方一切佛菩薩聲聞眾大仙天眼者。

亦禮菩提心。遠離諸惡道。能得生天上。乃至證涅槃。
若我作少罪。隨心之所生。今對諸佛前。懺悔令除滅。
我今身口意。所集諸功德。願作菩提因。當成無上道。
十方國土中。供養如來者。及佛無上智。我今盡隨喜。
有罪悉懺悔。是福皆隨喜。我今禮諸佛。願成無上智。
十方大菩薩。證於十地者。我今稽首禮。願速證菩提。
得證菩提已。摧伏於魔軍。轉清淨法輪。饒益衆生類。
常願住世間。無量俱胝劫。擊於大法鼓。度脫苦衆生。
我沒於欲泥。貪繩之所繫。種種多纏縛。願佛垂觀察。
衆生雖垢重。諸佛不厭捨。願以大慈悲。度脫生死海。

現在諸世尊。過去未來佛。所行菩薩道。我今願修學。
具足波羅密。成就六神通。度脫諸衆生。證於無上道。
了知諸法空。無相無自性。無住無表示。不生亦不滅。
又如大仙尊。善了於無我。無補特伽羅。乃至無壽者。
於諸布施事。不執我我所。爲安樂衆生。施與無慳悋。
願我所施物。不假功用生。觀察了知空。具施波羅密。
持戒無缺減。得佛淨尸羅。以無所住故。具戒波羅密。
忍辱如四大。不生分別心。以無瞋恚故。具忍波羅密。
願以身心力。發起大精進。堅固無懈怠。具勤波羅密。
以如幻如化。及勇猛精進。金剛等三昧。具禪波羅密。

願證三昧智入於三脫門。了三世平等。具慧波羅密。諸佛妙色身。光明大威德。菩薩精進行。願我皆圓滿。

偈出大寶積經。彌勒菩薩所問會第四十二。云彌勒名稱者。勤修如是行。具六波羅密。安住於十地。

說已起立。作如是唱。

迴向發願已歸命禮三寶。一拜

九旋遶自歸

禮竟起立。整理衣服。手執香爐。立定少頃。緣想三寶賢聖。叟塞道場。各坐法座。以次旋身。一一徧遶。安詳而轉。口作梵音唱云。

南無十方佛。南無十方方法。南無十方僧。南無

盧舍那佛。南無釋迦牟尼佛。南無三世三千佛。

南無梵網經菩薩心地品。南無彌勒菩薩摩訶薩。

如是稱名。或三或七。旋遶畢。還至像前。結三自歸。

自歸依佛。當願眾生。體解大道。發無上心。

自歸依法。當願眾生。深入經藏。智慧如海。

自歸依僧。當願眾生。統理大眾。一切無礙。

和南聖眾。

十坐念實相

行者禮懺竟。次應別就坐處。端身正坐。閉目合口。

調和氣息。如止觀前方便中廣明。次卽諦觀向所
犯罪。爲因心故犯。爲因境故犯。爲亦因心亦因境
故犯。爲不因心不因境故犯。若因心故犯。彼境不
現前時。何以無犯。若因境故犯。境自犯罪。不應我
犯。又若我因境犯。則聖人於境。何以不犯。若亦因
心亦因境故犯者。爲是心境各有犯性。待合方犯。
爲是心境各無犯性。合乃生犯。若心境各有犯性
者。何須待合。又合時便有二犯。若心境各無犯性
者。合何能犯。如一砂無油。衆砂豈能出油。如是因
心因境。雙因心境。尚自不得犯之生處。况復不因

心不因境而生犯耶。當知犯性本自不生。我迷倒
故。於無心無境無持無犯性。妄計有心有境有於
違犯。如是違犯。本性空寂。非滅故空。作是觀已。於
心無所得。於境無所取。不見罪生相。不見罪滅相。
但以虛妄顛倒因緣故。非生似生。以覺悟虛妄顛
倒因緣無性故。非滅說滅。是名觀罪性空。此觀若
得相續現前。自然煩惱漸薄。慧性漸開。卽是得戒
之先容也。又觀此罪。爲在內。爲在外。爲在中間。爲
在過去。爲在現在。爲在未來。過去已滅。現在不住。
未來未有。云何有罪。又觀此罪。爲身造耶。爲心造

耶。若身造者。地大造耶。水火風大造耶。空大造耶。若心造者。心復云何。青黃赤白耶。長短方圓耶。內外中間耶。過現未來耶。心尚無形。安能造罪。如是觀已。不得能造。不得所造。但以無明熏習。虛妄顛倒。因緣於無能無所性中。幻見能造所造。今以正智如實觀察。身心既空。罪福無主。如彼霜露。慧日能消。如久闇室。一燈能破。又觀此心。雖復本性空寂。無能無所。無罪相。無福相。絲無相故。無礙無際。不可思議。橫徧豎窮。無法不具。無法不造。隨其所造。一法仍復。卽是全體大用。還具一切法。還造一

切法。無有一法而非所造。亦無一法而非能造。如是觀已。卽於罪相深達實相。實相卽是本源成佛。常住法身三昧。此觀若成。必發戒體。是故經云。應當靜觀察。諸法真實相。不生亦不滅。不常復不斷。不一亦不異。不來亦不去。如是一心中。方便勤莊嚴也。如上事儀。名福德莊嚴。如上理觀。名智慧莊嚴。有事儀而無理觀。不能清罪之源。有理觀而無事儀。不能竭罪之流。譬如舊井。忽墜穢觸。宿水臭濁。新泉不來。理須汲盡。并撤汗泥。則泉脈冷然。不改柴冽也。問曰。經中制令要見好相。坐時何不諦

觀諸佛相好。乃令推簡入空耶。答曰。欲觀諸佛相好。須是戒根清淨。及了達是心作佛。是心是佛者。方可修習。今戒既有缺。解未必圓。若作意觀相。恐招魔事。故必以空觀洗滌罪塵也。問曰。經云。觀佛相好。滅無量劫生死重罪。豈不能滌破戒垢。答曰。觀相好者。實能滅罪。然須利智上根。方堪修習。妙觀而推簡性空。則是大乘初門。正治破戒心垢。問曰。彼韋提希及五百侍女。何必盡是利智上根。答曰。梵語韋提希。此翻思惟修。豈非利智。生值佛世。親感佛臨。豈非上根。問曰。五停心中。多障衆生。應

修念佛觀。豈反招魔。答曰。報障重者。令念佛功德。以除夙罪。亦未必單念相好。若現罪未拔。輒求好相。戒慧俱劣。魔必得便。問曰。若爾。則經中不應令得好相。答曰。夫好相者。不可以有心求。不可以無心得。今但深觀罪性本空。罪既拔已。自成感應。譬如磨鏡。垢淨像現。方超有心無心二過。問曰。圓覺經明修三觀者。非彼所聞。一切境界。終不可取。今既觀罪性空。設復得見好相。豈不境觀相違。答曰。此事理二懺。祇期滅罪。原無著意求相之心。惟其空觀既深。罪根永拔。感應道交。好相斯現。雖見好

相仍了性空。故無喜動擾心。亦不驚愕亂意。如此方是罪滅戒復之相。若見好相時。不與空觀相應。或復喜動擾心。不能寂靜。或復驚愕亂意。不得輕安。當知卽是魔事。切須諳識。勿被境迷。爾時仍須深入空觀。但念惟心。若是魔事。必漸隱沒。若實好相。倍復增明。而能助發空慧。令無取著。故知推簡法門。於滅罪障。有大功能。初心易入。令蕩無始虛妄。我法二執。頓達大乘實相正理。行者若能如是。事理二懺。精進勤修。不惟滅罪。亦有三根證相。不同下根。先獲戒品清淨。復有三品。一下品者。得諸

好夢。并覺諸根明淨。四大輕安。道心增長。二。中品者。於坐禪中。見諸靈瑞。光華異香。善聲稱讚等。得法喜樂。三。上品者。於靜心中。自見身相端嚴。威儀無缺。篇聚戒相。次第現前。安隱無怖。中根證得定品清淨。或發世間淨禪。或發亦世間亦出世禪。或復發出世禪。是爲三品。上根證得慧品清淨。或發觀行。或階相似。或入分真。具如法華三昧等廣明。

梵網經懺悔行法

正定王蔭福施錢十一千文敬刻此卷連圈計字

五千三百八十四箇

同治十三年夏五月金陵刻經處識

其... 諸... 勤... 品... 無... 去... 香... 伏...

毘尼後集問辯

明菩薩戒弟子藕益智旭述

問。梵網云。於未受戒人前說七佛教戒者。犯輕垢罪。若謂但遮誦時。不遮講時者。誦時僅宣文句。講時備解義理。重筌輕魚。有何意旨。

答。比丘戒法。關係僧輪。為防賊住。故一切俱遮。菩薩戒法。普收五道。解義發心。事非所禁。但誦戒時。恐有發露懺悔之事。不合令未受者知。故云不得說也。

問。菩薩戒本。止列四重。梵網廣明十重。詳略不同。又梵網犯十重者。必見好相。方許更受。戒本但云

失菩薩戒。應當更受。寬嚴有異。此二經典。一是本師和尚宣揚。一是授戒闍梨親述。不應互相違反。畢竟如何會通。

答。戒本出於地持。地持合殺盜婬妄。其名出家八重。善生問經列殺盜婬妄。酤酒說過。名優婆塞六重。梵網備二經之義。總爲十重。瓔珞亦同。良繇所被之機不等。故詳略之致有殊。今戒本止列四重。復有三義。一者在家欲受此戒。必已先受五戒。出家欲受此戒。必已先受十戒。具戒殺盜婬妄。既是根本性重。不須更列。故惟列此。增上戒法也。二者菩薩戒法。逆順無

方爲衆生故。容可少分現行性罪。此之四戒。理無開許。故獨列之。三者根本四罪。一犯永墮。受五戒十戒具戒時。已明斯義。大乘教門。雖通懺悔。必以見相爲期。此之四法。犯雖失戒。猶堪更受。恐濫前四。故獨列之。若梵網謂犯重必須見好相者。正繇釋迦是大戒和尚。一往立法。不得不嚴。而彌勒旣作授戒闍梨。輕重開遮。理須詳悉。今應准諸經論。參合發明。當知殺盜等四。隨犯一種。諸戒並失。得見好相。大可重受。而比丘法中。仍無僧用。酤酒等六。隨犯一種。失菩薩戒具戒以下。不名爲失。故殷勤悔過。許其重受。此二經

所以互相影略非相違也。

問。比丘法中。遮罪難緣。乃開。今大士律儀。爲利他。故。性罪有開。遮罪無文。此義云何。又逆順二行。若階聖位。則自他能益。倘凡夫初學。身心力弱。自尚有虧。安能利人。或駕言菩薩。藉口悲心。順情所作。爲有罪否。

答。遮罪爲護衆生。大士皆應同學。惟住少利少作少方便者。不共學之。若難緣所開。旣已同聲聞學。何須更開。惟此性罪。一向但遮。故須開也。就開聽中。不揀凡聖。但令果出悲心。願代他苦。深生慚愧。不以爲功。則戒身無恙。倘駕言藉口。率意任情。止成自欺。必虧戒體。莫貪大士之虛名。而招長夜之苦報也。

問。受戒羯磨文中。若無授者。聽佛像前自受。梵網自誓受戒。必須要見好相。不得好相。不名得戒。復云何通。

答。受戒一事。須論因緣。因是內心殷重。緣是授受分明。約修證則貴因深。約教道則藉緣具。是以比丘律藏嚴住持僧寶之體。尊重衆緣。瓔珞地持。開趨向菩提之路。但觀因地。梵網最初結戒。理須二法並扶。故雖許自受。必以見相爲期也。又復應知。如起信所明。

或有衆生以大悲故能自發心。或因正法欲滅以護法因緣故能自發心。復有見佛色相而發其心。今梵網制令求見好相。所以使其發趨菩提。地持許其像前得受。則但指彼已發心者。是則梵網嚴於立法。地持嚴於擇人。亦互爲表裏也。復次瓔珞經云。諸佛菩薩現在前受。名上品戒。法師相授。名中品戒。千里無師。像前自受。名下品戒。亦無求見好相之言。然猶一往約外緣分別耳。復有論云。發增上心得增上戒。又云。心無盡故戒亦無盡。是則亦可約內因分上中下也。今人求戒。大須自審。果能念念與悲智相應。上荷

正法。下憫含生。便可直遵瓔珞地持。設不遇師。亦得自受。如或雖希佛道。悲智未深。則須秉持梵網法門。千里無師。必求好相。更或現有明師。心存憍慢。不從求受。別向像求。斯則兩經咸所不聽。五悔終不成功。旣欲遠趨極果。豈容因地不真。豪傑之士。斷不宜自欺自誑矣。

問。大乘重在內因。今時律師與人受菩薩戒。可知其內因真否。如或不真。名得戒否。如不得戒。則設犯十重。還以十重定其罪否。

答。菩薩戒羯磨文中。具有觀察當機之法。若不能知

其內因而妄相傳授。不免無解作師之過。彼受戒者不善無記心中。雖不發戒。然既濫膺菩薩之名。自當依法判罪。非若比丘戒中。竟以賊住論也。

問。懺罪羯磨中。許向小乘悔過。梵網經中。不得向未受菩薩戒者前說此千佛大戒。尚不應向說。况可向悔過耶。又云何通。

答。小乘雖未受菩薩戒。而是住持僧寶。堪受懺悔。又聲聞人雖未識長者。是父。實是長者真子。非餘一切未受戒者可比也。至於半月說戒遣之令出。則是布薩常規。亦是彈斥微旨。不可執此而難彼矣。

問。梵網初輕戒中。見上座和尚阿闍梨等。應如法供養。四十一戒中。教誡師應教請二師。又五逆加弒二師成七。今授菩薩戒。云何止有一師。既得戒已。稱誰爲和尚耶。

答。若准經文。似須二師。然瓔珞地持。並止一師。又梵網受法。傳自什師。載於義疏。亦止一師。所云請二師者。恐卽是請佛菩薩耳。所云應如法供養二師。及弒二師成逆。則徧指比丘戒等。二師亦可。

問。重定受戒法中。初時問答。既已發菩提願。云何悔罪之後。復令發於四弘。豈不招重繁之過。

答菩提心者非止一發。惟應數發。令菩提心相續不斷。况前是審因。今是秉法。前是發心向道。今是誓鑑莊嚴。豈云重複。且如先已請師。像前復請。又如授比丘戒。屏問遮難。僧中復問。亦可云重繁耶。

問既謂機感有殊。授法不一。則若簡若繁。俱無乖舛。既謂增設科條。義因文隱。則直宗一轍。更爲痛快。何必會三家成一式。方爲契理契機。

答理無多致。機貴隨宜。直宗一轍。其說甚當。但根器不同。習性各別。始予獨遵慈氏羯磨。往往有嫌其太略者。既法可融通。何妨參酌。乃敢折衷。會三爲一。但用經論成言。更不別加文飾。三典現並流通。想是機宜有在。聊順一時之機。匪敢執今非古。可用與否。一任後賢。

毘尼後集問辯

湘鄉龔定瀛施錢四千二百文。敬刻此卷。連圈計字二千一百七十五箇。
同治十三年夏六月金陵刻經處識

邵陽魏如海施錢五千文

邵陽魏綉君施洋銀九圓

長沙黃上達施錢八千文

道州何慶徵施錢四千二百文

上元林鼎文施錢四千二百文

四明釋堅三施洋銀一圓

石埭沈振瑞施洋銀二圓


其刻梵網玄義一卷梵網合註七卷連圈計字十二萬二千四百三十八箇

同治十三年春正月金陵刻經處識

合註跋語

夫本源心地。含生共有。無染性戒。日用不知。目翳而華舞。大空夢蟻。而尋羶階下。晴虛之體依然。輪王之身如故。哀哉妄惑。枉受幻輪。勞我慈尊。現身同患。示成不倦。於八千垂化。無偏於塵刹。一滴之心地。既敷積劫之沈迷。立醒而琅函久錮。半珠僅呈。繫我愚蒙。得探全寶。竭思殫機。塵培泰嶽。思法緣之匪易。輒涕泗以滂沱。願我同仁。深思力學。解行同遵。自他俱利。庶得上報佛恩。不負己性矣。

時



70063213

崇禎丁丑地藏大士誕日菩薩沙彌智旭閣筆故
記

夫	大	觀	心	即	舍	主	其	有	無	染	抄	海	日	俱
所	華	轉	火	之	地	而	存	蘇	甜	不	翻	盡	之	對
王	之	製	印	之	無	之	無	之	無	之	無	之	無	之
同	思	示	列	不	列	列	列	列	列	列	列	列	列	列
心	少	心	少	心	少	心	少	心	少	心	少	心	少	心
同	思	示	列	不	列	列	列	列	列	列	列	列	列	列
王	之	製	印	之	無	之	無	之	無	之	無	之	無	之
所	華	轉	火	之	地	而	存	蘇	甜	不	翻	盡	之	對

